

茗香堂史論

茗香堂史論卷四

海鹽彭孫貽羿仁氏著

同郡朱葵之栗山校正

遼史

遼史起太祖阿保機不敘先世本紀旣完追敘於論贊之首亦是創體紀稱阿保機生而體如三歲兒三月能行晬而能言知未來事齟齬言必及世務伯父當國疑輒咨焉又謂豫知死日丙戌秋初必有歸處其然豈其然邪太祖紀于殂後稱曰昇天皇帝何其俚也阿保機長九尺豐上銳下誠異人也

聖宗紀葬景宗於乾陵以近幸朗掌飲伶人撻魯爲殉上
與皇太后因爲書附上乾陵其事誕而可笑隆緒只年十
一皆當國者爲之夷俗如此甚多不足書之於冊

北土江寒冬至大凌中春始解聖宗紀十一月觀漁撻馬
樂十二月己亥觀漁玉盤灣辛丑觀漁濬淵隆冬而漁豈
鑿冰下罟耶又然萬魚燈于雙溪魚燈不知何義 七年
品打魯瑰部節度使勃魯里至自界酒河天地晦冥大風
飄四十三人飛旋空中良久乃墜數十里外一酒壺在地
乃不移

遼初荒陋無文太祖時因太子倍之言建孔子廟已而制

契丹大字至聖宗乃祀孔子至興宗而工賦詩道宗親出題試進士頒行史記漢書后妃亦有能文詞者荒服之風漸變矣

道宗時三河縣民孫賓及妻皆百歲復其家百歲異矣齊眉尤異自古以來所未聞也

祭山儀立君樹臣樹又植雙樹爲神門又名拜山禮 瑟禮所以祈雨有射柳儀 再生儀又名柴冊儀歲一周星天子一行是禮所以報本有再生母后搜索之室 射鬼箭出師以死囚還師以俘或諜植柱縛之矢集如蝟名鬼箭

遼自開國以兵力并北荒太宗窮兵南伐身死軍中大臣
因東丹之讓國徽李胡之暴殘共立世宗社稷之長計也
太后偏愛阻兵大母與嫡孫鋒鏑幾交輒贖相拒於今爲
烈非屋質解紛綱常瓦裂矣初廢東丹繼祖李胡國家重
器愛憎由于婦人作法于涼踵禍再世興宗不能尊崇嫡
母坐致上京之弑何惑乎君臣割及輕于鳬雁同氣篡弑
潛于敵仇雖復講藝右文焉能掩戎狄豺狼之習哉道宗
昏蔽于讒賊焚椒之冤妻子不保哀哉降而延禧忘荒不
武用亡其國然二百餘年國祚亦惟聖宗培之也

欽滄后佐太祖用賢伐叛內贊功多然捨太子立德光已

開亂端猶云太宗雄畧能興契丹也繼乃與世孫爲難發
兵相拒何哉斷腕殉葬已見安忍之一端 梟斤以官人
生興宗興宗旣立弑害正嫡繼又欲廢帝立少子重光遷
居慶州七栝宮悔而迎歸侍養惟謹終爲不懌帝崩無戚
容崇聖悲泣如禮反謂之曰汝年尙幼何哀痛如是此其
爲人獸畜不如

東丹爲堂醫無閭絕頂藏書萬卷工文章書畫射騎獵
雪千角鹿圖皆入秘府旣入中國遣使問安不絕從珂簪
紱乞師請討忠孝無虧夷裔乃有此賢

義宗順宗皆位當儲貳一則避地歸唐一則讒賊見害大

統終歸天與其子追尊崇報有由來矣 義宗以元子讓國帝昶奄歿群心並歸世嫡察割之變亂定於穆宗復以淫酗凶終大統仍系世宗之子不可謂非天也

高模翰戰關南方與趙延壽聚議有光自日中出縈繞旗矛燄燄如流星久之喜曰天贊也進兵殺獲甚衆猛將勝兵之氣乃見於眉宇可謂異矣

女里善識馬嘗行野見數馬跡指其一曰此奇駿也以已馬易之果然夫能辨駿于馬跡又在九方牝牡驪黃之上開泰五年秋獵帝射虎馬馳太速矢不及發虎將犯蹕左右辟易陳昭衮捨馬捉虎兩耳騎之虎駭且逸上命衛士

追射昭衣大呼止之虎雖軼山昭衣終不墜伺便拔佩刀
殺之上設宴悉以席上金銀器賜之騎虎救駕忠勇雄絕
今古

太宗崩于灤城大臣諸王立世宗太后怒遣李胡以兵逆
擊敗歸盡執世宗臣僚家屬軍次潢河橫渡隔岸相拒耶
律屋質從太后世宗知屋質善籌乃奉書以試太后太后
以書示屋質屋質曰李胡永康王皆大祖子孫神器非移
他族太后宜思長策與永康王和議太后曰誰可遣者屋
質請往太后遣授書于帝帝遣耶律海思復書詞多不遜
屋質諫曰書意如此國家之憂未艾能釋怨以安社稷莫

如和好帝曰彼衆烏合安能敵我屋質曰卽不敵奈骨肉
何況未知孰勝借曰幸勝諸臣之族執于李胡者無噍類
矣以此計之惟和爲善帝良久曰若何而和屋質曰與太
后相見各紓忿恚和之不難不然決戰非晚帝乃遣海思
詣太后往返數日議定始相見怨言交讓殊無和意太后
謂屋質曰汝當爲我畫一籌屋質曰太后與大主若能釋
怨臣乃敢進說太后曰第言之屋質借謁者籌執之謂太
后曰昔人皇王在何故立嗣聖太后曰太祖遺旨又謂帝
曰大王何故擅立不稟尊親帝曰人皇王當立不立是以
去之屋質正色曰人皇王捨父母之國而奔唐子道當如

是邪大王見太后不少遜謝惟怨是尋太后率干偏愛託先帝遺命妄授神器如此何敢望和當速交戰擲籌而退太后泣曰太祖遭諸弟亂天下荼毒瘡痍未復詎可再乎乃索籌一帝曰父不爲而子爲又誰咎亦取籌而執左右感激太慟太后復謂屋質曰議既定神器竟誰歸屋質曰太后若授永康王順天合人復何移李胡厲聲曰我在元欲安得立屋質曰禮有世嫡不傳諸弟昔嗣聖之立尙以爲非況公暴戾怨讟萬口一辭願立永康王不可奪也太后顧李胡曰汝亦聞此言乎汝實自爲之乃許立永康王帝謂屋質曰汝與朕屬尤近何乃反助太后屋質曰臣以

社稷至重不可輕付故如是耳上喜其忠讀此書忠肝義
膽字字陽秋折太后之偏私責永康以不遜李胡殘暴卷
舌吞聲傳中情事如畫借籌擲籌若憤若激太后流涕左
右感慟忠臣心舌栩栩生動鄴侯傳不得崙美於前屋
質深情妙用全在勸誘太后與帝相見旣已覲面天親骨
肉自然感觸卽有戾色違言自然消歇當老人淚墮左右
失聲爾時卽有豺狼面目鐵石心肝未免徘徊色動干戈
立解不煩詞說

栗山按屋質此舉有三善弭兵爭一正綱常二戰凶暴
三然非太后始迷終悟亂無已時矣

屋質屢發天德等奸謀又力請防察割世宗不聽察割既弑太后及帝因僭立有言衣紫者不可失屋質亟易衣出遣人召諸王及禁衛討賊遣弟冲迎壽安王至王尙猶豫屋質曰大王嗣聖子賊得之必不容羣臣將誰事悔將何及王始悟諸將聞之相繼至察割執百官家屬夜關內府見瑪瑙枕曰此希世寶今爲我有妻曰壽安王屋質在吾屬無唯類此何足異察割曰壽安年幼屋質不過引數奴詰朝來朝不足憂遲明諸軍圍之察割弑皇后柩前愴惶出陣其下多委兵歸壽安察割知其不濟將殺群官家屬耶律敵獵在繫中進曰不有所廢壽安王何以興藉此爲

詞猶可以免察割從之遣敵獵往壽安合敵獵誘察割至
鬱之穆宗卽位謂屋質曰朕之性命實出卿手命知國事
初安端遣察割奏事太祖太祖謂近侍曰此子目若風駝
面有反相朕若獨居無合入門太祖之明屋質之智察于
幾先可謂卓絕

耶律渥里思每戰重鎧揮鐵槊所向無前從上伐晉至河
獵海東青鵲搏雉晉人隔水以鴿引去上顧左右曰誰爲
我得此人渥里思請內廐馬濟河擒之并殺救者數人而
還帝以一鵲而輕用猛將何無大風猛士之思耶

金史

金始祖函普居完顏部僕幹水之涯非姓完顏也後遂以完顏爲姓攷其國語完顏乃漢語王姓則金於漢音國王氏也

函普年六十餘完顏顏有賢女六十而未嫁函普以青牛聘之遂生二子一女爲金之祖奇矣長子烏魯始築室居于安出虎水之側故金人之興異於諸族之逐水草者烏魯并吞諸部遼使問盈歌攻阿疎城事方議償其俘虜烏魯乃令人阻絕鷹路揚言于遼欲開鷹路非女真節度使不可遂令烏魯討阻絕鷹路者而罷問阿疎城事以從

禽之樂不問所部之并吞宜乎金之輕遼也

遼人言女真兵滿萬不可敵此見遼兵之積弱耳若百戰之兵卽女真十萬猶可破之背嵬八字西川荆襄之兵與女真長勝軍力戰皆大破之何言不可敵也

金有三捷懶兩婆盧火一爲穆宗子左副元帥捷懶一爲太宗子薛王宗懿深捷懶一爲平章政事毅英原知名捷懶一爲平章事泰州婆盧火一爲慶直尹婆盧火

金史諸帥無定卽一撒离喝而或稱杲或稱撒离喝一編之中互書舛錯如此

徐徽言死節不必詳書于帝紀但言不屈見殺足矣後諸

將傳中凡遇微言之死必詳述不嫌其複金人重之不嫌再三也

栗山按重忠節固屬夷裔所難然諸將傳必詳述要非史例

太宗與乞買不自立其子仍立太祖子亶可謂大公熙宗立未幾宋王宗磐翼王鶻懶以謀反誅矣未幾降封太宗諸子皆爲公矣何其少恩哉

海陵紀以諫伐宋弒皇太后徙單氏于寧德宮卽宮中焚之棄其骨水中諫者以下達上之稱太母以母訓子名諫可乎書法倒置矣

金初兵最強海陵時宿將盡亡子孫誅鉏殆盡行伍皆具
文故虞雍公得以書生決勝世宗時命護衛善射者押賜
宋使弓宴宋使中五十押宴者纔中其七世宗謂左右將
軍曰護衛出爲五品官每三日上直役亦輕矣飽食安臥
弓矢不習將焉用之金武事之弛可見世宗復修和好大
爲有見

世宗制爲改嫁母服三年此雖教孝然使人輕于改嫁守
志苦節者鮮矣聖人制禮必爲可經宜善明其意不必輕
爲改制 又制命婦犯奸不用夫廕以子封者不拘此法
亦是重法而輕節也子貴而封乃尙有犯奸者當與命婦

同科然按法行之雖足維風無以安孝子於在位世宗之制雖非大經觀過知仁與服嫁母同一義

夏任得敬脅其主李仁孝上表請中分其國李石等皆請許之世宗不許并却其貢甚得人君之度後高麗王皓廢兄覲自立詐稱讓國金因而冊之西京留守趙位寵叛之請以四十餘城附金世宗不聽王皓遂殺位寵皓以弟篡兄位寵遂以臣叛王世宗距位寵位寵則以覲爲辭也覲終以幽死金何以謝之

世宗每令人譎女真詞欲謂太子諸王曰朕思先朝行事未嘗暫忘故時聽此詞汝輩自幼惟習漢人風俗不知女

茗香堂史論卷四

真純實之風至於語言文字或不通曉是忘本也又命衛士有不閑女真語者並令習學仍禁自後不得漢語憂危思深子孫苟知此意何至亡國

金酒禁甚嚴海陵時近臣有犯者罪至死世宗時尙諄諄禁戒非元旦生辰不置酒臣民非婚姻祭祀令節不許飲酒大定十八年始許女真成邊人遇祭祀婚嫁節辰自造酒具以戒淫侈防昏亂甚得妹邦酒誥之意諸夏有不及者

世宗謂朕所至有司每虛而不居甚無取元如李氏喪過市不聞樂聲謂宰臣曰豈以如故禁之耶細民日作而食

禁之廢其生計也其勿禁其見卓絕曲體臣民又無不盡
大定二十一年追貶海陵爲庶人二十二年東京留守徒
單貞以與海陵逆謀伏誅妻永平縣主子慎思並賜死討
賊一何緩也

右司郎中段珪卒世宗曰是人明正可用燕人自古忠直
者鮮遼兵至則從遼宋人至則從宋本朝至則從本朝屢
經變遷而未嘗殘破蓋以此南人挺勁敢言直諫者多前
有一人見殺後復一人諫之甚可尙也北人之見輕外朝
亦已久矣異日與元爲敵爲宋仗節皆南士也世宗真知
人哉然在漢季田疇不肯仕操翼德流離從主謂燕人自

古鮮忠直亦未可槩也

世宗謂唐太宗少年能用兵雖居帝位猶不能改吮創剪髮皆權謀也又謂光武人所難能更始旣害伯升當離亂之際不思報怨事更始如平日不見戚容豈非人所難能乎此其度量蓋將大有爲也其他庸主豈可及高祖英雄駕馭豪傑非光武能及然卽帝位猶有麓豪之氣光武所不爲也卓識明論言言破的

盧溝橋章宗所作 章宗時禮官言民一產三男內有才
行可用者量材敘用其嫗婢所生官給錢百貫資乳哺尙
書省請更給四十貫贖爲良制可夫品胎生人偶異耳量

材而用豈必一產三男之家哉百貫乳哺厚矣又以四十貫贖爲良不亦過乎當立爲制奴婢一產三男准一人留役二人免爲良不須給贖 章宗許內外官并承應人祖父母父母忌日給假一日真錫類之孝 章宗好文多藝無經國遠圖傳授非人遺產不保妻孥爲戮他何足稱

衛王記注失亡王鶚求大安崇慶事不可得金故部令史竇祥年八十九能記舊事從之得二十條司正張正之寫灾異十六條張承旨家舊事五條金禮部尙書楊雲翼日錄四十條陳老日錄三十條藏史館多重複校去重出刪其繁雜章宗日錄詳其前事宣宗日錄詳其後事又金掌

日女官大明居士王氏所記資明夫人授璽事附于篇可
以存其梗槩云

宣宗謂宰臣江淮之人號稱選懦然官軍攻蔓菁峒其衆
困甚脅之使降無一從者河朔州郡一遇北警往往出降
此何理也從來爭天下者取北易定南難

天會五年楊級造大明厯因宋紀元厯增損之正隆大定
以後日食或先後天命司天監趙知微重修之翰林應奉
耶律履亦造乙未厯命尙書禮部集驗太陰虧食知微爲
近終金百年用之厯惟一易

金入汴取宋渾儀致于燕天輪赤道懸象司辰天池水壺

等器人皆棄毀惟渾儀置太史局候臺汴距燕千里地勢高下不同望筭中極星稍差移下四度纔得窺之明旦六年龍起渾儀驚雲水跌下臺中裂渾儀僕臺下營緝復置臺上貞祐南渡遂委而去宣宗時司天臺官請鑄渾儀公私罄乏遂寢初禮部尙書張行簡嘗制蓮花星九二漏以進章宗置蓮花漏于禁中星九漏以備巡幸貞祐南渡二漏遷汴汴亡廢毀無所攷其制

明昌間薦牛魚注牛魚似鮪鮪類也無則鯉代牛魚不知何狀大都魚之大者

大定八年定功臣配享圖畫于太廟左廡金源郡王撒改

宋王宗望

韓離不

金源郡王幹魯梁王宗弼

兀

金源郡王襲

室魯王闍母隋公阿离合懋豫公蒲家奴

昱

充公劉彥宗

右丞相韓企先尚書令李右右丞相金源郡王紇石烈志

寧左丞相僕散忠義左丞相崇公紇石烈良弼右丞相萃

公石琚右丞相申公唐括安禮平章政事徒單合喜參知

政事宗欽十九人

又魯莊明至闍母

已世宗思太祖太宗創業艱

難求當時勲業最著者圖像衍慶宮遼王斜也金源郡王

撒改遼王宗幹

幹木

秦王宗翰

粘罕

宋王宗望梁王宗弼金源

郡王習不失幹魯希尹婁

楚王宗雄

謀良虎

魯王闍母金

源郡王銀朮可隋公阿离合滿金源郡王完顏忠豫公蒲

家奴金源郡王撒商喝衮公劉彥宗特進幹魯古習室齊公韓企先凡二十一人與配享太廟者大小同異

古大享用牛宋政和五禮太廟親祀用牛有司行事則不用
熙寧二年昊天上帝皇地祇用犢餘大祀以二羊五豕
代一犢大定十年定祫祭親祖每室一犢時享親祀宗廟
共一犢有司行事則不用十二年祫祭攝官共用三犢二
十三年祫祭親祀用三犢有司行事以鹿代今祀孔子以
鹿代牛制始于金

泰和中完顏匡請以創業功臣配享武成王廟于是以宗
翰宗雄宗望宗弼等待坐武成王位在管仲上降韓信而

下立于廡黜王猛慕容恪等二十餘人胡人妄自夸大至以粘罕幹闥不謀良虎兀朮躋管仲之上管仲尊周攘夷真得太公兵法者王猛不欲滅晉其見亦與仲父同金人卑之斥之蟬蛸而笑大椿也

泰和中太常寺奏開元禮祭帝嚳堯舜禹湯文武漢高祖版御署開寶禮高祖以下二十七帝不署平章政事鎰等謂方嶽之神各有所主有國所賴御署固宜前古帝王寥落杳茫列于中祀亦已厚矣不須御署夫二帝三王道法相傳有天下者必宗述致敬垂訓將來今謂不及方岳之神列之中祀已厚夫堯舜禹湯文武道之所在天地同流

豈等若教之鬼望殯葬於後世登之大祀且不加增夷裔之人較禮隆殺謂之中祀已厚真足噴飯

女真拜禮先袖手微俯身稍却跪右左膝左右揺肘袖上拂左右肩下拂膝凡四如此者四跪復以手按右膝單跪左膝而成禮國言揺手而拜謂之撒速承安五年命公裳則朝拜如漢制便服則用本朝拜是金人半用漢拜也

金人儀仗衛士皆金鳳花交脚幞頭或皂帽拳脚幞頭或赤平巾幘長脚幞頭錦帽彷彿宋制 金百官從一品三公三師尙書令丞相平章元帥樞密從者六十人藤牽骨朱牙杖交椅水罐鑊鑊孟子吐壺以次執之其從盛矣畧

如漢唐之制明之六卿內閣公侯只有開棍並無儀導今亦同之

金之理財最爲無法雜用遼宋劉豫舊錢錢法旣壞濟以鐵錢鐵不可用權以交鈔鈔至不行權以銀貨官利于大鈔民利于小鈔于是易交鈔爲寶券未幾又作通寶又改作寶泉又織綾印鈔名曰珍貨珍貨未久復用寶會訖無定制而金以亡國用之屈未有若金者蓋金用兵妻子咸予廩給賞又無紀焉得不匱國家生財田賦之外無如錢法鹽法金雖據有燕汴然南方產銅之鄉西方兵甲之利皆在宋夏而金欲以金源上京魚鹽梨棗之利而襲中華

聲名文物之容宜乎國易貧則易絀兵易弱矣

金之失計在於盡遷女真人戶以實燕京而南徙河南括民田以予軍而民困虛金源黃龍諸戶而兵弱軍民交困焉得不亡

世宗拳拳於上京禁女真人戶不許效漢裝漢語深有見金之交聘表不亦贅乎

女真初無文字不知祖宗故事太祖妹亦不知其名與所配穆宗子烏帶始好書破遼獲契丹漢人始通二國字烏帶諸子皆學之宗雄兩月盡通契丹大小字完顏希尹依契丹字製女真字粘罕好訪問女真老人多得契丹及祖

宗遺事太宗復進士舉稍拔文學之士詔求祖宗遺事備國史烏帶撫始祖以下十帝綜爲三卷事始得傳

完顏十二部皆以部爲氏亦有部人以部爲氏非宗姓也遂不可辨

金諸帥粘罕斡离不兀朮最强粘罕欲先下西邊緩于江南金主不能用頻年戰江淮巴蜀終不能有遂令西夏苟延後遂許爲敵國始知粘罕之謀遠矣蓋金雖克汴而延西強兵皆爲夏守若金先以全力攻夏夏不支而滅滅夏而圖宋雖岳韓吳劉之兵且不能與金抗不待兀而南北爲一矣故知斡离不兀朮之謀皆不如粘罕也

栗山按金旣破汴虜徽欽江南之人且破贈然猶不克
底定若移之攻夏延西之兵強於宋南渡之兵百倍且
地勢犬牙曠騎精兵不下于金烏能保其必滅倘宋宗
澤韓岳之師卷甲長驅乘間而入金方腹背受敵自顧
不暇矣粘罕之謀未必全是

兀朮取和尚原毅英先奪新义口留兵守之夜大雪道路
皆冰吳璘重兵扼之兀朮用毅英計自旁山叢薄間出不
意遂取和尚原毅英請速入大散關本部爲殿以備伏兵
至仙人關毅英攻之兀朮止之不聽以刀背擊其堦牟使
之退毅英曰敵氣已沮不乘此取之後必悔已而果然兀

元歎曰旣往不咎乃班師若用穀英策急攻蜀吳璘屢敗不能振必無蜀矣元朮此時功成而怠強弩之末矣朱仙之敗席捲北走蓋又老而頽矣金史粉飾之過如所云旣往不咎聖人之言元朮胡人豈解雅言理所必無徒資一笑

阿离合懣強記一見終身不忘始未有文字祖宗族屬並其默記人非舊識聞其祖父名卽能道其部族世次所出積年舊事人或遺忘一一辨折言之天輔三年寢疾宗翰曰往問之盡得祖宗舊俗法度上幸其家問以國事對曰馬者甲兵之用今四方未平國俗多以良馬殉葬可禁止

之乃獻平生所乘戰馬

完顏希尹本名谷神金人始用契丹字太祖命希尹撰本國字希尹乃因漢人楷字倣契丹字制度合本國語製女真字其後熙宗亦製女真字希尹所撰謂之女真大字熙宗撰謂之小字

劉豫張邦昌次兀朮傳後不倫太甚邦昌傳寥寥數行云宋史自有傳此復列之尤贅

撻懶縱秦檜南歸力主和議稱臣割地殺大將以自弱則撻懶固金之功臣也兀朮幹離不本皆主戰故以撻懶歸河南地爲非夫割地資宋撻懶之算固疎然曰通宋爲謀

叛則非也夫檜之殺岳飛以爲功深畏金也苟撻懶果奔宋兀朮等重兵壓境檜必執撻懶以悅金撻懶豈能叛金哉金史之言不足信也

栗山按秦檜主和議不過迎合高宗之心其殺岳忠武以其梗和議也卽此以觀可知通金之非實君子惡居下流天下之惡皆歸其檜之謂矣

酈瓊謂金人南伐元帥國王親臨罪陣矢石交集免胄指揮意氣自若將士孰敢愛死江南諸帥每身居數百里外一介持文調發制敵決勝委之偏裨小捷露布飛馳增加俘級以爲已功微功邀厚賞大罪不誅何能振起邪眾俱

爲確論古今同弊

孔彥舟荒于色有禽獸行妾生女姿麗彥舟苦虐其母使自陳非已女遂納爲妾

金人營汴張中彥作河上浮梁匠者未得法中彥手製小舟數寸不假膠漆首尾自相鉤帶謂之鼓子卯諸匠駭服張中孚中彥傳未謂二張雖小惠足稱然以宋大臣子父戰歿于金若金若齊皆不共戴之仇金以地與齊則臣齊以地歸宋則臣宋金取其地則又臣金若趨市然利所在豈復知所謂綱常也哉吁此等議論有關名教

夾谷吾里補多智畧膂力過人雖老勇健不少衰致仕一

百五歲卒世宗至上京有老人百三十餘歲能言太祖太宗時事海陵時常召曾從太祖破寧江州有功者得百七十六人賜酒帛有忽里罕解衣進太子光英曰臣今百歲有十子願太子壽考多男子與臣等海陵使光英受衣卽以所服并佩刀賜忽里罕遼水人多壽有云出谷產人蔭人飲其水故多壽

世宗御饌不適口召移剌溫嘗之奏曰味非不美蓋南北邊事未息聖慮有所在爾上意遂釋可謂淡言微中妙于解紛

粟山按然亦近於諂矣

蕭仲恭爲遼公主子能披甲超囊馳遼之宗戚子別爲一班號孩兒班仲恭嘗爲本班詳穩營建汴京河東陝西材木浮河下砥柱筏工多沈鄭建請于砥柱解筏順流散下令善浮者下流接之此等心思以幹國事有何難者世宗時近侍請罷科舉世宗問張浩曰自古帝王有不用文學者乎對曰有曰誰歟曰秦始皇世宗顧曰豈可使我爲始皇乎遂寢

張元素素剛毅人畏憚之往往以片紙署字其上治瘡輒愈人皆異之

奔睹名昂海陵時縱飲輒數日不醒海陵常面戒之得間

輒飲如故大定初妻子爲置酒未數行輒臥不飲其妻大氏海陵從母姊怪而問之昂曰吾本非嗜酒向時不以自晦汝弟殺我久矣今遇明時當自愛奔睹虜人乃得陳平之智

烏延查刺手持兩鐵簡重數十斤左右揮擊無不僵仆號鐵簡萬戶窩斡募人刺之令僞爲護衛得阿不沙身長有力奮大刀自後斫之查刺回顧以簡背擊阿不沙折其右臂查刺平居和易臨戰奮勇雖重圍萬家出入若無人之境

撻不野名大臭蓋姓大名臭也字書無臭字止有臭字音

胡考反同果義未詳豈卽此字之訛

烏延蒲黑等傳贊曰陷泉之捷震電燁燁苻離之克我勢
攸赫隴坻爆擣淮渦鈎鉤成矣故列敘諸將之功故爲磬
牙以文其拙豈直筆之體乎

石琚傳末撫其遺事曰金內燕惟親王公主附馬得與世
宗一日召琚入諸王竊語世宗曰使我父子家人安然無
事有今日之樂者此人力也歷舉數十事以曉之皆伏議
罪大定末世宗將立元妃爲后以問琚琚屏左右曰元妃
之立本無異詞如東宮何世宗愕然曰何謂也琚曰元妃
自有子元妃立東宮搖矣世宗悟而止人主家事人臣所

難言許敬宗一言幾亡唐祚琚之格心真忠臣也史官書法深得史漢遺筆

徒單克寧遺表曰人君往往重君子而反疎之輕小人而終昵之顧慎終如始安不忘危真千古明言

史抃搭拳勇善鬪槍長二丈號長槍副都統手箭長不盈握百數散置鎧中以鞭擊之或以指鉗飛擲數矢齊發發無不中敵以爲神其箭以智創雖子弟不傳其法按此卽今袖箭也

完顏承暉守中都外援盡潰承暉別家廟作遺表付尙書省令史師安石論平章政事高琪包藏禍心終害國家復

引咎不能終保都城爲謝妻子已死滄州爲書以從兄子
永懷爲後從容若乎日盡出財物召家人隨年勞多寡分
之皆與從良書舉家號泣神色泰然與安石引滿既被酒
取筆與安石訣最後倒寫二字投筆歎曰遽爾謬誤非神
志亂耶謂安石曰子行矣出門聞哭聲復還已仰藥死矣
承暉生富貴居家類寒素常賓司馬光蘇軾像于書室曰
吾師司馬而友蘇公完顏乃有此人

益都楊安國倡亂山東名楊安兒金人屢討殺戮數十萬
賊益聚號紅襖賊時青李全皆其餘孽

完顏仲完本姓郭有功賜姓兵最强號花帽軍人呼謂郭

大相公

完顏霆拒宋兵于朐山柵隔湖港霆作港中暗橋令偏將率死士由暗橋登山霆以兵趨山下約以昏時舉火爲期上下夾擊宋兵大敗墜澗溺水死者不可計暗橋之制未詳

初胡沙虎弑衛王立宣宗朝臣皆謂衛王失道自絕于天虎推戴有功無罪尙書省請修衛王事迹史官謂賈益謙常事衛王宜知其事遣編修一人就鄭訪之益謙謂之曰昔海陵被弑而世宗立禁近能暴海陵惡者輒得美任故當時多所附會衛王勤儉慎惜名器較其行事中材不及

者多矣吾知此而已設欲飾吾言以實其罪吾亦何惜餘
年朝論偉之金史謂益謙盡事君之義海陵之事君子不
無遺憾正隆之惡暴其大者足矣中箚之醜史不絕書嘻
其甚矣誠如益謙所言也

宣宗棄中都遷汴已無可爲一時謀臣諫士尙有高汝礪
張行素完顏素蘭陳規許古之徒共攻朮虎高琪之誅金
已壞不可支若盡用胥鼎侯摯完顏弼必蘭阿魯帶等猶
可稍支河北收拾關陝延數十年之祚或亡或棄不亦悲
哉

事冀在經筵論人臣有事君之禮事君之義不敢齒君

之路馬蹏芻有罰入門則趨見几杖則起召不俟駕命不宿家此謂禮也至關國家之利害則禮者特虛器耳獻可替否至于引裾折檻斷鞅斬輪有不恤焉當是時也姑徇事君之虛禮不知事君之大義國家何賴焉上變色曰非卿不聞此言雲翼快論令公孫宏胡廣孔光張禹之徒無所藏其奸

崔立傳末田論曰金俘人之主帝人之臣適啓崔立之狂謀以成青城之烈禍曾子曰戒之戒之出乎爾者反乎爾者也可不信哉亦是千古快論

崔立之變聶天驥被創甚矣病臥十餘日其女舜英謁醫

救療天驥歎曰我幸得死兒女尙欲我活耶竟鬱鬱以死
舜英葬其父明日亦自縊赤蓋尉斫致仕居汴聞變召家
人付以後事望睢陽慟哭以弓絃自縊死彼中尙有忠義
如此深可歎尙

蒲察官奴詐降以立斫營之功力爭蔡不可守至於憤憤
此乃武夫不學無術坐以謀獻主于宋被誅冤矣金史胡
盧提不能正其是非

蔡州被圍女真人無死事者長公主言于哀宗曰近來立
功效命多諸色人無事時則自家人爭強有事則他人盡
力焉得不怨哀宗默然讀此古今同歎

元兵圍鳳翔郭蝦蟆堅守軍士死傷旣衆積薪州廨呼集
家人及將校妻子閉諸一室將焚之蝦蟆妾欲有所訴立
斬之火熾率諸將士持滿火前以待城破兵入鏖戰旣久
士卒有弓盡矢絕挺身入火中蝦蟆獨上大草積門扉自
蔽發二三百矢無不中者矢盡投弓劍于火自焚城中無
一降者自來死事真此猛烈

世戚傳謂天子娶后王姬下嫁秦漢以來無世甥舅之家
關雎道缺外戚驕盈古者異姓公侯與天子爲昏姻他姓
不得參焉女爲王后已尙王姬自貴其貴富厚不加焉使
漢唐行此無呂王武氏之難矣金之徒單挐懶唐括蒲察

紇石烈僕散皆貴族也娶后嫁主必于是此昏禮最得宜者盛于漢唐矣其論亦確

燕京石鼓馬定國以字畫考之是宇文周時所造作辯萬餘言出入傳記引據甚明

阿鄰妻沙里質遇黃龍叛卒攻鈔傍郡阿鄰從軍沙里質糾集居民男女五百人樹營棚爲守賊千餘來攻沙里質以羶爲甲以裳爲旗夫男授甲婦女鼓噪沙里質仗劍督戰三日賊去以聞封金源郡夫人 夾谷胡山妻阿魯真寡居有衆千餘其父承克爲上京元帥爲行省太平所執應滿鮮萬奴阿魯真治廢壘修城郭以自守萬奴招之不

從乃射承克書人城阿魯真碎之曰此詐也萬奴急攻之
阿魯真衣男子服與其蒲帶督衆力戰殺數百人生擒十
餘人乃解去復遣將擊萬奴兵獲其將一人 詔封郡公
夫人以婦女立功有高涼錦織風烈

附金國語 頭曰兀朮 心曰粘罕 珠曰銀朮可 金

曰按春 布囊曰蒲盧渾 盤曰阿里虎 山曰阿鄰

海曰忒鄰 舟曰沙忽帶 坡陀曰阿懶 生鐵曰幹論

釜曰閭母 刃曰斜烈 搥曰婆盧 松子曰阿虎里

羔曰活离罕 犬子曰合喜 犬有文曰訛古 貂鼠

曰糾哥 安樂曰賽里 來曰迪古乃 迅速曰撒八

無賴曰謀良虎 貌不揚曰阿里孫 瘠人曰什古乃
鰲黑曰撒合輦 人奴曰阿合 老人曰撒答 第九曰
烏 十六曰女魯歡 臂鷹鵞者曰阿离合滿 王姓曰
完顏 商曰烏古論 高曰紇石烈 札曰徒單 耶曰
女奚烈 朱曰兀顏 李曰蒲察 張曰顏蓋 溫曰溫
迪罕 蕭曰石抹 曹曰奧屯 魯曰孛朮魯 劉曰移
剌 石曰斡勒 康曰納剌 全曰夾谷 麻曰裴滿
魚曰尼忙古 趙曰斡准 雷曰阿典 何曰阿里侃
空曰溫敦 惠曰吾魯 孟曰抹顏 强曰都烈 駱曰
散答 田曰阿不哈 蔡曰烏林答 林曰僕散 董曰

朮虎 汪曰古里甲

元史

洪武二年宋濂王禕纂修元史紀三十六卷忠五十三卷表六卷傳六十三卷因順帝無實錄事有缺畧三年復命增修紀十卷志五卷表二卷傳三十又六卷前書未備頗爲完足

宋濂條例稱兩漢本紀兼有書春秋之義事實言辭並載唐本紀嚴謹全法春秋元史本紀準兩漢 歷代史志其法不同唐志悉以事實組織攷覈爲難惟宋史條分件列覽者易見元史因之 漢唐史表所載爲詳三國史五代史無之遼金史據所可攷作表不計詳畧元史準遼金史

茗香堂史論卷四

歷代史各有論贊元史據事直書不作論贊

元太祖本紀二十一年丙戌十一月丁丑五星聚于西南不言何度當時史官未置分野不明也計宋史當載之金水二星常附日而行十一月見於西南日沒之時當在斗分

金史稱承麟爲亂兵所殺太宗本紀稱獲承麟殺之豈別有據耶

元初文物不備太祖削平四十國見角觶始還兵時無載筆之臣以紀其事可惜也

太宗九年左翼諸部訛言括民女帝怒以括女賜其麾下

大非人君之度

太宗崩遺命以皇孫矢烈門爲嗣六皇后乃馬氏稱制四年而後立君定宗雖立年已四十朝政猶出于六皇后定宗崩又三歲無君皇后海迷失稱制諸王拔都推戴始立憲宗元之初造兩朝繼體母后戀權久懸大位作法于涼焉得不亂

憲宗紀謂遵祖宗之法不蹈襲他國所爲元起荒漠原無良法可遵既有天下當法前代帝王乃嗜獵尙巫仍然夷習耳

世祖開國宋猶未平李璫復反乃簽捕鷹坊人匠等軍徒

弘州錦工繡女於京師豈造邦開運之道乎復營瀆山大
玉海敕寘廣寒殿造五山珍御榻成置瓊華島廣寒殿侈
靡若此宜順帝之以侈麗淫戲亡國也世祖末年益好淫
巧令尙衣局織無縫衣

世祖時宣政院言宋全太后瀛國公母子爲僧尼有地三
百六十頃乞如例免其租從之夫亡國降王備列杞宋地
租不免必爲僧尼始免之已爲非體又宋亡令追毀宋故
官所受告身何其不廣 楊連其珈發宋陵家百有一所
戕人命無數得鈔一十萬田三千畝金寶無算以金
銀寶器修天衣寺旣已未刑修寺傲福何爲元之修毒甚

矣

中統三年郭守敬請開玉泉水以通今漕艘得直抵
通倉剝運入京皆守敬力也 至元十一年定差稅課程
增益者卽上報隱漏者罪之不須履畝增稅以括百姓元
初當國得人其令如此今丈量之役費民間億萬金錢增
賦無幾徒飽奸蠹

火器自古未聞宋初有飛石礮車以機發石元有回回礮
又合蒙古漢人能造礮者皆送京師蓋火攻之器精于宋
而備于元今兵家恃此爲長技五兵廢而不講火器雖利
無精兵以翼之往往藉寇不可恃恃也

至正二十一年司農上學校二萬一千百餘宣政院上天下寺宇四萬二千三百十八區僧尼二十一萬三千百四十八人僧尼之區十倍學校如此

元人好貨楊連真伽以發家用朱清張瑄以海盜貴毒流不已桑哥旣敗省臺請誅楊連真伽亦有請誅清瑄世祖終不許可知其故矣

世祖智計度量殊絕于人削平敵國兵不留行其失在于黷武窮兵奄有諸夏乃復力通西域窮極天南再貶於安南喪師於日本意猶不已廷臣力爭始罷兵革阿合馬要束木盧世榮桑哥皆以言利進毒流天下民怨已極然後

誅夷迹其爲道足以亡國終有天下何也在于知人善任
宋之降將呂文煥夏貴范文虎蒲壽庚等咸尊顯富貴之
宋之文臣留夢炎許衡葉李莫不優禮任使之是以羣材
趨附樂於赴功

成宗時詔雲南行省自願征八百媳婦者二千人人給貝
子六十索渰人未嘗識錢每貝子十準此中銅錢一六十
索準小錢六千 世宗時凡再喪師于安南日本成宗踵
之復喪師于雲南八百媳婦何喪敗相仍而不悔也

武宗立鷹坊爲仁虞院秩正一品丞相領之此何可訓
蒙古諸帝仁宗爲優成宗末命宗社動搖削平內難迎武

宗于上都有功不居大位終歸盡去不急之務爲皇太子
時業已多所匡正元時重西僧每修佛事帝師多請釋重
囚朝廷曲赦以從之仁宗時雲南行省右丞算只兒威有
罪國師圖監吉幹節兒奏請釋之帝斥之曰僧人宜頌
佛書官事豈可與邪最識治體英宗識治體無過舉然
如封鷹師不花爲趙國公追封乳母夫阿來爲定襄王此
等仍然胡習非帝王治世法

魏齊周書北史皆紀夷習金遼史亦然未嘗以國語入文
字泰定帝卽位上都詔全是蒙古語鄙野可笑宋王兩公
文章宗匠何乃酷無體裁

英宗之弑雖出羣凶然泰定不可謂無其意也觀其內侍
倒刺沙常偵朝廷機事遣子哈散事丞相拜住且入宿衛
意欲何爲聞鐵失逆謀囚其使上變告未至而英宗遇弑
諸王奉璽北迎遽卽位于龍居河何急于居尊綏于討賊
也然則囚使上變恐事不成姑爲此自却耳卽位數日始
誅也先鐵市兒完者鎖南禿滿于行在更誅鐵失禿兒
赤斤鐵木兒脫火赤章台於大都非其本懷也 安西王
阿難得於成宗末命幾危宗社其子月魯帖木兒復與南
坡弑逆之謀可謂世濟其惡

泰定三年八月鹽官州大風海溢壞隄防三十餘里遣使

祭海神不止徙居民千二百五十家四年四月復僭侵地
十九里命都水監及行省發二萬餘人以竹落木柵實石
塞之不止五月命天師張嗣成修醮之政和元年三月
遣戶部尙書李家奴往鹽官祀海神詔帝師修佛事于鹽
官州造浮屠二百一十六以壓海溢又元貞中潮嘯鹽官
海鹽兩州爲患特甚天師張與材以術治之一夕大雷電
以震明日見有物魚首龜形者磔于水裔潮患遂息嗣成
與材子也當時兩邑之患如此明季有人行苦竹山下沙
中多井灶遺址往往得古鏡盤盂等物豈爾時所徙耶
粟山按大海之中怪怪奇奇何所不有磔死之物亦會

文宗於泰定之末諸臣推戴遽卽尊位雖非其正猶云有
名僞讓明宗復陰弑之身爲亂賊何以貽後三子俱卒卒
以無後豈非天道元史多爲君諱惡文宗紀末止載至正
詔書數其弑君之罪以爲斷案不復更置一詞順宗紀中
又載此詔一史而重見失于剪裁

三 碧琳閣叢書

名香堂史論卷四

賓一宮終其天年報存孤之德可也殺之中途過矣此皆強臣伯顏輩之謀不盡出于帝元數已終英宗之英明也被弑明宗之仁厚也被弑順帝之昏庸也終立以亡其國豈非天耶

伯顏跋扈無君擅殺皇后不道極矣又請殺張王趙劉李五姓漢人尤爲凶惡幸帝不從

元疆域甚大東極高麗西至滇池南踰朱崖北極鐵勒測驗之遠古所未有與堯時畧同而北方尤遠南海北極出地十五度夏至影在表南晝五十四刻夜四十六刻衡嶽北極出地二十五度夏至日在表端無影晝五十六刻夜

四十四刻此爲南方極中之地嶽臺北極出地三十五度
夏至晝六十刻夜四十刻此爲天地之中也和林北極出
地四十五度夏至晝六十四刻夜三十六刻鐵勒北極出
地五十五度夏至晝七十刻夜三十刻北海北極出地六
十五度夏至晝長八十二刻夜十八刻大都北極出地四
十度晝六十二刻夜三十八刻余觀先哲之論謂夏至長
止六十刻正統時晝長至八十一刻帝遂北狩乃天道變
也今康熙八年夏至晝長幾六十二刻言厯者駭之不知
元時大都夏至晝長原至六十二刻不足爲怪且北海日
長至八十二刻不尤可駭乎人患不多讀書耳多所見少

所怪于此益信

元初用金大明歷庚辰歲太祖西征五月望月蝕不効二月五月朔微月見西南中書令耶律楚材以大明歷後天乃損節氣之分減周天之抄去交中之率治月轉之餘以正大明歷之失推上元庚子歲天正十一月壬戌甲子正冬至日月合璧五星連珠同會虛六度以應太祖受命之符又以西域中原地里殊遠創爲里差以增損之雖東西萬里不復差忒名曰西征庚午元歷表上不果頒用至元四年西域札馬魯丁進萬年麻世祖稍頒行之十三年詔許衡王誨郭守敬改治新歷參攷歷代異同酌中以爲歷

本十七年歷成名授時歷復令太子諭德李謙爲歷議發
明攷証前仕附合之失自古及今推驗之精無出于此

驗氣舊法植表以度中晷然表短促尺寸未易分別景虛
而淡難得實景今以銅爲表高三十六尺端挾二龍舉一
橫梁下至圭面共四十尺圭表刻爲尺寸舊寸一今伸爲
五釐毫差易分別創爲景符以取實景其製以銅葉博二
寸長加博之二中穿一竅若針孔以方間爲趺一端設爲
機軸令可開合摺其一端使其斜倚北高南下竅達日光
如米許隱然見橫梁于其中舊法以表端測晷所得日體
上邊之景今以橫梁取之實得中景不容有豪髮之差劉

宋祖冲之取至前後二十三、四日，晷景析取其中，定爲冬至。且以日差比定時刻，宋皇祐間，周琮則取立春、立冬二日之景以爲去至既遠，日差頗多，易爲推攷。紀元以後，諸厯爲法，加詳大抵不出冲之之法。歲差堯典冬至日在女虛之交，漢元和二年在斗二十一度，晉太元九年在斗十七度，宋元嘉十年在斗十四度，宋梁大同十年在斗十二度，隋開皇十八年在斗十二度，唐開元十二年在斗九度半。今退在箕十度，取其距今之年，距今之度較之多者七十餘年，少者不下五十年，輒差一度。宋慶元間改厯，取大衍歲差率八十二年及開元所距之差五十五年析取。

其中得六十七年爲日却行一度之差質諸天道差爲近
密以之考古則增歲餘而損歲差以之推來則增歲差而
損歲餘上推春秋以來冬至往往皆合下求方來永久無
弊 自春秋獻公以來二千一百六十年用大衍宣明紀
元統天大明授時六厯推算冬至凡四十九事大衍合者
三十二不合者十七宣明合者二十六不合者二十三紀
元合者三十五不合者十四統天合者三十八不合者十
一大明合者三十四不合者十五授時合者三十九不合
者十今按獻公十五年戊寅歲正月甲寅朔旦冬至授時
厯得甲寅統天厯得乙卯後天一日僖公五年正月辛亥

朔冬至授時統天皆得辛亥與天合昭公二十年己卯歲
正月己丑朔冬至授時統天皆得戊子並先一日若曲變
其法以從之則獻公僖公皆不合矣以此知春秋所書昭
公冬至乃日度失行之驗一也大衍攷古冬至謂宋元嘉
十三年丙子歲十一月甲戌日南至大衍與皇極麟德三
歷皆得癸酉各先一日乃日度失行非三歷之差今以授
時歷攷之亦得癸酉二也大明五年辛丑歲十一月乙酉
冬至諸歷皆以爲甲申亦日度之差三也陳太建四年壬
辰歲十一月丁卯景長大衍授時皆得丙寅是先一日太
建九年丁酉歲十一月壬辰景長大衍授時皆得癸巳是

後一日一失之先一失之後若合于壬辰則差于丁酉合于丁酉則差于壬辰亦日度失行之驗五也開皇十一年辛亥歲十一月丙午景長大衍統天授時皆得丙午與天合至開皇十四年甲寅十一月丁酉冬至大衍統天授時皆得戊戌若合于辛亥則失于甲寅合于甲寅則失于辛亥其開皇十四年甲寅歲冬至亦日度失行六也唐貞觀十八年甲辰歲十一月乙酉景長諸厯得甲申貞觀二十三年己酉歲十一月辛亥景長諸厯皆得庚戌大衍厯議以永淳開元冬至推之知前二冬至乃史官依時厯以書必非侯景所得所以不合今以授時厯考之亦然八也自

前宋以來測驗景氣者凡十七事其景德丁未歲戊辰日南至統天授時皆得丁卯是先一日嘉泰癸亥歲甲戌日南至統天授時皆得乙亥是後一日一失之先一失之後若曲變其說以從景德則其餘十六事皆後天從嘉泰則其餘十六事皆先天亦日度失行之驗十也前十事皆授時歷所不合以此理推之非不合矣今于冬至畧其日度失行及史官依時歷書者凡十事則授時歷三十九事皆中統天歷與今歷不合者僅有獻公一事大衍歷推獻公冬至後天二日大明後天三日授時歷與天合下推至元庚辰冬至大衍後天八十一刻大明後天一十九刻統天

歷先天一刻授時歷與天合以此較之授時爲密矣 列
宿度數歷代不同非微有動移則前人所測或有未密
漢落下閎測角十二度一行皇祐元豐崇寧所測皆同至
元所測十二度十一分 元九度崇寧九度少至元九度
二十分 氏十五度皇祐十六度至元十六度三十分
房五度元豐六崇寧五度太至元五度六十分 心五度
皇祐六崇寧六度少至元六度五十分 尾十八皇祐十
九崇寧十九少至元十九度一十分 箕十一皇祐十元
豐十一崇寧十度半至元十度四十分 東方共七十五
度皇祐七十七元豐七十九崇寧七十八至元七十九度

二十分 斗二十六度及分大衍二十六皇祐二十五至
元二十五度二十分 牛八度皇祐七崇寧七少至元七
度二十分 女十二皇祐十二崇寧十一少至元十一度
三十五分 虛十一行十度少強元豐九少強至元八度
九十五分 危十七皇祐十六崇寧十五半至元十五度
四十分 室十六皇祐十七至元十七度一十分 壁九
崇寧八太至元八度六十分 北方九十八度乃分一行
九十八度二十五分皇祐九十五度二十五分元豐九十
四度二十五分崇寧九十四度七十五分至元九十三度
八十分太 奎十六崇寧十六半至元十六六十分 婁

十二至元十一度八十分 胃十四皇祐十五至元十五
度六十分 昂十一崇寧十一少至元十一度三十分
畢十六一行十七皇祐十八元豐十七崇寧十七少至元
十七度四十分 觜二一行一崇寧半至元五分 參九
一行十崇寧十度半至元十一度一十分 西方八十度
一行八十一皇祐八十三元豐八十二崇寧八十三至元
八十三度八十五分 井三十三崇寧三十三少至元三
十三度三十分 鬼四一行三皇祐二崇寧二半至元二
度二十分 柳十五皇祐十四崇寧十三太至元十三度
三十分 星七崇寧六至元六度三十分 張十八元豐

十七崇寧十七少至元十七二十五分 翼十八元豐十
九崇寧十八太至元十八度七十五分 軫十七至元十
七度三十分 南方一百一十二度一行百一十一皇祐
百一十崇寧百九度一十五分至元百八度四十 分今
按恒星隨天而行不變不動今古所測參差如此郭守敬
所云微有動移者是也今西人之論亦然非前人所測未
密也 晝夜百刻十二辰每辰得八刻三分刻之一以地
中揆之長不過六十刻短不過四十刻地中以南夏至去
日出入之所爲遠其長有不及六十刻者冬至去日出入
之所爲近其短有不止四十刻者地中以北夏至去日出

入之所爲近其長句不止六十刻者冬至去日出入之所爲遠其短有不及四十刻者今京師冬至晝刻三十八刻夜刻六十二夏至晝刻六十二夜刻三十八蓋地有高下日出入有早晏所以不同授時歷一以京師爲正一元歷每日百刻十二辰每辰八刻三分有奇明大統歷每辰八刻子午兩辰十刻天體至圓何得兩辰偏長乎今西歷止九十六刻便于推算耳當以授時歷爲正至于因地定日出早晏今西人分省爲時刻卽郭守敬遺法 曰 觸月俱東行日遲月疾月追及日是爲一會交值之道有陽歷陰歷交會之期有中前中後加以地形南北東西之不同

人目高下斜正之各異此食多寡理不得一也合朔既正
推而上之詩書春秋及三國以來所載虧食無不合焉者
書允征季秋月朔辰弗集于房按大衍歷仲康卽位五年
癸巳歲九月庚戌朔日食也小雅十月之交朔日辛卯日
有食之梁太史令虞卨云十月辛卯朔在幽王六年乙丑
歲也右詩書所載二事春秋三十七事以授時歷推之惟
襄公二十一年十月庚辰朔及二十四年八月癸巳朔不
入食限自有歷以來無比月而食之理其三十五食皆在
朔經或不書日不書朔公羊穀梁以爲食晦二者非左氏
以爲史官失之者得之其間或差一日二日者由古歷疏

闕置閏失當姜岌一行已有定說孔子作書但因時歷以書非大義所關故不必致詳也自後漢章武元年下訖本朝計三十五事密合者授時七大明二親者授時十有七大明十有六次親者授時十大明八踈者授時一大明三踈遠者授時無大明六 定期朔日行一度晝夜之間月先日十二度有奇二十九日五十三刻復追及日與之同度是謂經朔古法未密初用平朔一大一小故日食有在朔二月食有在望前後者張衡以月行分九道何承天以日行盈縮定小餘故月有三大二小隋劉孝孫欲用其法議者以爲迂怪卒不行唐傳仁均始采用之李淳風甲子元

麻定朔之法逆行淳風又以晦月頻見故立進朔之法虞
鄺曰苟躔次既合何疑于頻大日月相離何拘于間小一
行曰天事誠密雖三大四小庸何傷唐人弗克若天止用
平朔本朝至元常議始革至如進朔之意止欲避晦日月
見殊不思合朔在酉戌亥距前日之卯十八九辰若進一
日則晦不見月苟合朔在辰申之間法不當進距前日之
卯已踰十四五度則日見于晦庸得免乎月之隱見天道
之自然朔之進退人爲之牽強孰若廢人用天不復虛進
爲得其實哉 古今厯法 三統厯漢太初元年丁丑鄧
平造行百八十八年後天七十八刻 四分厯東漢元和

二年乙酉編訃造行百二十一年後天七刻 乾象厯建
安十一年丙戌劉洪造行三十一年後天七刻 景初厯
魏景初元年丁巳楊偉造行二百六年至宋元嘉先天五
十刻 元嘉厯元嘉二十年癸未何承天造行二十年至
大明癸卯先天五十刻 大明厯大明七年癸卯祖沖之
造行五十八年至魏正光後天二十九刻 正光厯正光
二年辛丑李業興造行十九年至興和庚申先天十三刻
興和厯興和二年庚申李業興造行十年至齊天保先
天九十九刻 天保厯北齊天保元年庚午宋景業造行
一十七年至周天和丙戌後天一日八十七刻 天和

後周天和元年丙戌甄鸞造行十三年至大象己亥先天
四十刻 大象歷大象元年己亥馮顯賓造行五十年至
隋開皇甲辰後天十刻 開皇歷開皇四年甲辰張賓造
行二十四年至大業戊辰後天七刻 大業歷大業四年
戊辰張胄玄造行十一年至唐武德己卯後天七刻 戊
寅歷武德二年己卯道士傅仁均造行四十一年至麟德
乙丑後天四十七刻 麟德歷麟德二年乙丑李淳風造
行六十三年至開元戊辰後天十二刻 大衍歷開元十
六年戊辰一行造行三十四年至寶應壬寅先天十四刻
五紀歷寶應元年壬寅郭獻之造行二十三年後天二

十四刻 貞元歷貞元二年乙丑徐承嗣造行三十七年
先天十五刻 宣明歷長慶二年壬寅徐昂造行七十一
年先天四刻 崇元歷景福二年邊岡造行十四年先天
四刻 欽天歷五代周顯德三年丙辰王樸造行五年至
宋建隆庚申先天二刻 應天歷建隆元年王處訥造行
二十年至太平興國辛巳後天二刻 乾元歷太平興國
六年吳昭素造行二十年至咸平辛丑合 儀天歷咸平
四年史序造行二十三年至天聖甲子合 崇天歷天聖
二年宋行古造行四十年至治平後天五十四刻 明天
歷治平元年周環造行十年至熙寧甲寅合 奉元歷熙

寧七年衛樸造行十八年至元祐後天七刻 觀天厯元祐七年皇君卿造行三十一年至崇寧癸未先天六刻

占天厯崇寧二年吳泰姚舜輔造行三年後天四刻 紀

元厯崇寧五年姚舜輔造行二十一年至金天會丁未合

大明厯金天會五年丁未楊綬造行五十三年至大定

庚子合 重修大明厯大定二十年趙知微重修行百一

年至元至元辛巳後天十九刻 統元厯後宋紹興五年

陳德一造行三十二年至乾道丁亥合 乾道厯乾道二

年劉孝榮造行九年至淳熙丙申後天一刻 淳熙厯淳

熙三年丙申劉孝榮造行十五年至紹熙辛亥合 會元

歷紹熙二年劉孝榮造行八年至慶元己未後天十刻
統天歷慶元五年乙未楊忠嗣造行八年至開禧丁卯先
天六刻 開禧歷開禧三年鮑澣之造行四十四年至淳
祐辛亥後天七刻 淳祐歷淳祐十年庚戌朱德卿造行
一年至壬子合 會天歷寶祐元年譚玉造行十八年至
咸淳辛未後天一刻 成天歷咸淳七年辛未陳鼎造行
四年至至元辛巳後天一刻 皇極歷大業間劉煊造不
行至唐武德二年己卯先夫四十三刻 乙未歷大定二
十年庚子耶律楚材造不行至辛巳後天十九刻 授時
歷至元十八年辛巳郭守敬造

疆域之大無過漢隋唐唐南北萬三千里元又過之南北萬六千九百里羈縻之域又不止此

河源漢使張騫唐使薛元鼎皆謂出於崑崙皆因西域未通未有親歷河源者元使自星宿海至赤賓河不可以道里計行凡七八日約畧七八百里又二日至九渡已千里矣九渡至崑崙行二十日又二千里矣然則河源在崑崙之上凡三千里謂於崑崙非也大雪山卽崑崙

元泰定中海溢鹽官州文宗時始息改曰海寧州 泰定元年鹽官州海溢壞隄塹侵城郭有司以石固木槽捍之不止四年捍海隄崩二千步四月復崩十九里發丁夫二

萬以木棚磚石塞之不止政和元年海隄溢益發軍民塞之置石囤二十九里石囤不知何式疑今斗門是也西
北水利久廢郭守敬鑿通州至都改引渾水溉田於舊牐
蹤跡導清水自昌平南折至西門入都滙爲積水潭東南
至通州白河節宣以通漕運置牐之處往往地中得舊
時磚木時人咸服之

賈魯治河精思障水之方逆流排二十七艘連以大桅長
椿麻索竹絙絞縛爲方舟又用索絙繞船身上下碇鐵貓
于上流又用竹絙長七八百尺者繫兩岍大槩上每絙或
碇二舟或三舟使不得下舡腹實散草小石以釘板合之

復以卷帟密布合于板上或二重或三重大索縛之復縛橫木於頭桅以索維之用竹編笆夾以草石立桅前長丈餘名曰水簾以木檣桅使簾不仆選便捷水工每舡二人執斧鑿立舡首尾岸上鳴鼓爲號齊鑿穴舟水人皆沉遏決河水怒溢故河水暴增重樹水簾復布小埽土牛白闌長梢雜草木土隨宜堆垛以繼之石船下詣實地出水基址漸高復卷大埽壓之前船勢略定尋用前法沉餘船以竟後功中流水深數丈用物施功數倍船隄距北岸三四十步勢迫河流峻急大埽高二丈者或四或五始出水面至河口一二十步薄龍口喧厖猛烈卷埽基裂欹傾俄遠

故所觀者股弁衆議騰沸魯神色不動機解捷出龍口隨
合河功乃成先是河上童謡石人一隻眼挑動黃河天下
反及魯治河果於黃陵岡得石人一眼汝頽寇起議者皆
謂由魯治河勞民動衆所致史臣謂此非通論使魯不興
是役亂豈無自而生乎治河百世之利豈得以勞民召亂
訛之秦築長城劉項以起然長城萬世之利也無趙高蒙
蔽于中章邯益兵而東劉項未必能勝也

栗山案石人本汝頽寇黨所埋以爲扇亂之驗卽陳涉
篝火狐鳴之意卽童謡云云亦其所布散總之順帝不
綱饑饉洊至而賦役煩重人心思亂雖曰人爲實亦天

意要非治河者之罪也

元樂器有閏餘匏七星匏九曜匏一絃三絃五絃七絃琴
皆西夏金宋遺制 中統間回回獻笙形如夾屏上銳兩
面縷金雕鏤雲物孔雀兩旁側立花板居背三之一中爲
虛櫃如笙之匏上豎紫竹九十管管絃實以木蓮苞櫃外
出小櫛十五上豎小管管端貫以銅杏葉下有座獅象繞
之座上櫃前立花板一雕鏤如背板間出皮風口用則設
朱漆小架于座前繫風囊于風口囊面如琵琶朱漆雜花
有柄一人按小管一人鼓風囊簧自隨調而鳴但有聲而
無律樂院判官鄭秀文又攷音律增改其制肩頸兩旁立

刻木孔雀二飾以孔雀羽中設機每奏一人鼓風囊一人
按律一人運機孔雀飛鳴應律名興隆笙 箏如瑟兩頭
微垂有柱十三絃篳篥制以木闊腹下施橫木如軫二十
四柱頭及首並如鳳喙 雲璈小銅鑼十三同一木架下
有長柄左手持柄右手小槌擊之卽今九雲鑼也

元祀典皆仍國俗文宗始袞冕大裘行郊祀禮世祖建太
廟皇伯朮赤察合帶亦以家人禮耐祭太宗定宗憲宗身
爲天子反皆不祀武宗享廟者三英宗親享者五文宗以
後始皆親享世祖作新廟以國師僧薦佛事於太廟七晝
夜又命宗廟祝文書以國字又改太祖主題曰成吉思皇

帝睿宗曰太上皇也可那顏皇后皆題國諱以夷俗施于帝王之廟真可笑也

郊祀志每稱制若曰云云若曰者以國語鄙俚不堪入史故以若曰槩之其體本於尙書曰若稽古王若曰之類也
栗山按曰若之若古訓順非此義

憲宗卽位冕服拜天日月山此元人冕服之始 英宗時盜入太廟失仁宗及慈聖皇后金主泰定時復失武帝神主及祭器此與盜高廟玉環者尤爲異變而祠官僅薄罰元德焉能長

太常博士言漢儒論七廟九廟之數有一章元成等謂周

七廟后稷始封文武受命三廟不毀與親廟四而七也劉
歆謂武王以后稷爲太祖增立高圉亞圉二廟于公劉太
王王季文王二穆之上已爲七廟至懿王時始立文世室
于三穆之上至孝王時始立武世室于三昭之上是爲九
廟先儒多是劉歆之說 元太廟睿宗順宗顯宗皆非帝
而追尊顯宗位順宗之上順宗躋成宗之上僖公有位躋
閔公上 之逆祀况未嘗正位可居故君之上乎 元諸
帝神御殿皆在佛寺藏玉冊玉寶金瓶等盤盂之屬世祖
影堂有真珠簾又有珊瑚樹碧甸子山余觀元人畫像皆
戴笠今讀冠服之制公服皆黑紗幘頭展翅公服皆右袵

其圓笠則王民私居之服上下皆然

元有射草狗燒羊毛之禮蒙古巫覡爲之后妊身及帝后彌留皆出居外廂帳產與殮畢以帳賜近臣元帝之殮剖楠木爲二剗中止足容身貂祿皮帽其靴襪繫腰俱用白粉皮爲之可笑也外束以黃金箍四穿土下葬不起墳

元之掾史各路儒學考選兼通經學吏事者爲上選每歲二人如今諸生例此制甚善勝今三考

朱書彌封皆始於元

元人封典如曾祖父母祖父母父母曾犯奸盜十惡除名等罪及例所封妻不是禮娶正室或係再醮倡優婢妾並

不許申請又如遭父母喪忘哀拜靈成昏者杖八十七離
之有官者罷之仍沒其聘財婦人不坐諸服內定婚各減
服內成昏罪二等仍離之聘財沒官諸婦人背夫喪舅姑
出家爲尼者杖六十七還其夫皆有功名教但子收父妾
兄收弟婦弟收嫂罪止杖一百七離之似輕耳元人每杖
必畸七示零不知何義

栗山案客中閒集元世祖定笞杖之刑曰天饒他一下
地饒他一下我饒他一下自是合笞五十止笞四十七
此畸七示零所由來也

元地極廣取財極博海運以省河漕市舶以收番貨皆富

強之術也田賦甚輕設勸農之官頒農桑之書所以富民者不一而足三代之制無以尚之其立法與遼金遠矣元有朱砂水銀碧甸子之稅茶權先重於蜀江浙以漸而增今江西川茶稅甚輕江南浙江獨重江南之松蘿岍片六安浙之龍井天目徑山遂甲海內

元太祖宮闈有幹耳朵四稱后者二十三人妃子十六人其後世因之稱后者無定位無紀極矣

元時防海設慶元上海澈浦三鎮吾浙鹽官素為要地明有四區悉將今海鹽改為遊擊視浙東三區似輕殆無遠慮河南行省言兩淮地險人頑宋亡之後始來歸順宜于

沿江一帶設鎮以鎮之蓋南北交爭者百年兩淮戰地衺習金革亡命輕生卒之明祖與張陳之徒皆起淮上以亡元行省之言長算遠識

木華黎元主稱爲四傑乃得前朝玉璽而不以獻其曾孫以寶玉貨之崔彧乃歸之尙方豈木華黎武人不學故爾邪

世祖在潛邸欲勸憲宗休兵回鶻以息民霸突魯曰幽燕之地龍蟠虎踞形勢雄偉南拱江淮北連朔漠居中以受四方朝覲果欲經營天下駐蹕之所非燕不可世祖慨然曰非卿言我幾失之世祖卽位定都於燕常曰朕居此臨

天下霸突魯之力也燕京成于金而居于元明及今三朝
定都之地皆斯人一言啓之誰謂迤北無俊傑乎

栗山案金左企功詩君王莫聽捐燕議一寸山河一寸
金亦是此意尤在霸突魯之前

太祖爲汪罕所襲兵散盡從者止十九人至班朱尼河糧
盡荒遠無所得食哈札兒射一野馬殪之剗革爲釜汲河
水煮而啖之太祖仰天爲誓使我克定大業當與諸人同
甘苦苟渝此言有如河水今滿人皆生啖牛羊元在迤北
乃必須火食邪且剗革焉能作釜不無粉飾否

太祖拔金中都授札八兒爲黃河以北鐵門以南天下

達魯花赤鐵門在東印度是遇角觴止兵地也

元滅諸國擇其賢智者用之如西夏鄯善竺乾回回雜部之才皆得其力故能削平海內如振槁

后妃傳盡載冊文其贅已甚

高智耀西夏儒者隱賀蘭山太宗訪求之憲宗用之世祖行其言始重儒者斯文之不滅智耀功爲大智耀子睿爲浙西廉訪使鹽官州民有連結黨與持郡邑短長自目爲十老吏莫敢問睿按以法闔境快之今海寧尙沿此風初名曰大老官繼而改其稱曰阿爹總其類也

鐵哥竺乾人父幹脫赤與弟那摩俱學浮屠氏兄弟相謂

曰世道擾攘吾國將亡東北有天子氣盍往從之偕見太宗太宗禮之憲宗命幹脫赤佩金虎符歸說迦葉彌兒國主國主殺之帝爲發兵誅國主而用鐵哥鐵哥因以直諫顯

襄樊五年不下西域人亦思馬獻新礮法攻樊破之移攻襄陽一礮中其譙樓聲如雷震城中洶洶諸將多踰城出降呂文煥乃降此用礮攻城之始

也烈拔都從憲宗出獵遇虎于隘下馬搏虎虎張吻手探虎口挾其舌拔佩刀刺殺之可謂神勇

察罕西域人博學強記清素自居居河中白雲山因以白

雲自號仁宗目之爲白雲先生而不名此等人中夏亦少
燕帖木兒於文宗不爲無功然肆行無忌至娶泰定帝后
爲夫人悖逆已甚前後尙宗女爲姬妾四十人或交禮
三日遣歸者後房不能盡識寔趙世延家男女雜坐名鴛
鴦會坐隅婦甚麗問爲誰欲與俱歸左右曰此太師家人
也荒淫體羸溺血而死幸矣其子以謀逆伏誅遂覆其宗
豈非天道伯顏旣誅唐其勢乃復效燕帖木兒所爲幸遇
從子脫脫得流放死全其宗脫脫代伯父秉政反其所爲
稱賢相然急報復近小人以此致敗國因以亡

夏人常八斤善造弓見知世祖常自矜謂耶律儒者無用

楚材曰造弓尙須弓匠爲天下豈可不用治天下匠耶世祖甚善之世祖西征至東印度住蹕鐵門關遇一角獸鹿形而馬尾綠色作人言謂侍衛者曰汝主宜早還帝問楚材曰瑞獸也名用觸能爲四方語好生惡殺天降符瑞以告陛下願承天意以全民命帝卽曰班師

察罕攻滁州張柔請決戰旣陣宋驍將出挑戰柔佯却宋將驕柔馳及之搥擊墜地宋將執柔轡曳入其陣飛石中柔鼻兩軍鬪柔得還裏創復戰觀此如畫柔旣勇健宋將亦勁敵也惜失其名

董文烟父俊爲將南征人多歸俊願爲之奴旣全其家歸

悉縱爲民鄰境人有被掠賣者亦贖還之干戈之際厚德
如此昌大宜矣

耶律留哥卒子入宿衛太弟命其妻姚里氏領其衆七年
世祖西征還姚里氏携次子善哥見帝于河西阿里湫城
帝曰健鷹飛不到之地爾婦人乃能來邪賜酒慰勞甚至
姚里氏奏長子薛闍廬從有年願以次子善哥代之使歸
襲爵帝曰薛闍從征西域救太子于合迷城身中創又與
回回格戰傷于流矢積功爲拔都魯不可遣當合善哥襲
父爵姚里氏拜且泣曰薛闍者留哥前妻嫡子也宜立善
哥婢子所出若立之私已而滅天倫竊以爲不可帝歎其

賢給騎四十從征河西賜俘人九口馬九匹金幣稱是許
薛聞襲奪而留善哥遣其季子永安從姚里氏東歸遼人
久漸華風卽賢婦女明理若此

劉整請降經畧使劉黑馬遣其子元振往受之語之曰宋
劉整名將瀘蜀之要衝今情僞不可知汝毋爲身慮事成
國家之利不成則效死其分也元振至瀘釋戎服從數騎
與整聯轡而入飲燕至醉整心服焉獻金五千男女五百
人元振以金分將士而還其男女此舉深得籠絡豪傑之
槩還其男女尤足服瀘人之心是以能效死不變也

憲宗遣西王旭烈兀西征至木乃今其國下百二十八城

至乞石迷部破其西城東城以梅檀爲殿宇焚之香聞百里得七十二絃琵琶五尺珊瑚燈檠拔三百餘城又西行三千里至大房下其城一百八十五又至賓鐵侃得城一百二十四西域平自古用兵之遠無如元者

王珣本耶律改姓年三十遇道士謂君相甚奇因一青馬而賣珣未之信居歲餘有客以青馬來鬻珣私喜倍價買之後乘以戰進退周旋無不如意常行凌水箚得古刀銘曰舉無不克動必有功佩之有警必先鳴故所向皆捷木華黎取東京命石抹也先以千騎爲前鋒也先曰兵貴奇勝何用多爲謀知金人新易東京留守將至也先獨與

數騎邀殺之懷其誥命至東京謂門者曰我新留守也至府中問吏列兵于城謂何以邊備對也先曰我從朝廷來中外宴然奈何陳兵以搖人心命撤之曰寇至在吾無勞爾輩是夜易置其將佐部伍三日木華黎至入東京如此智勇固可但東京守將何間牒疎忽乃爾邪

金驍將王子昌守保定張柔命何伯祥取之兵逼城子昌出走伯祥執槍馳馬追及之子昌射之中手貫槍伯祥拔矢棄槍策馬手搏擒子昌諸軍入宋境察罕自他道遽歸諸軍惶惶失措伯祥曰此必爲敵所遏不若出不意深入其地使彼不測乃可出也遂突戰至司空寨布魯爲攻取

勢夜爲營營火十炬代料銳于營側險要天明令士卒速行而鳴鼓其後宋兵來追伏發驚潰去追擊大破之轉戰百里他軍不能歸者皆賴以出退師自古爲難伯祥深通兵法眞良將也

張榮爲流矢貫背拔之不出令人以足抵其面額拔之神色自若趙匡刺與宋兵戰鵝灘被三創矢鏃入左肩不得出欽察惜其驍勇取死囚剗其肩視骨深淺知可出卽鑿其創拔鏃出之色不動如此健兒雲長刮骨不足獨擅

劉整夜率驍將十二人渡塹入信陽堡擒其守將還孟珙謂李存孝以十八騎拔洛陽今整所將更寡乃書其旗曰

賽存孝如此猛將呂文德忌之俞興扼之使之降元宋之不亡何待

郝經年九歲母許避亂土窖中亂兵熏之死經以蜜和寒菹汁決齒灌之卽甦此等不凡之人性成自幼

雲南未知尊孔子祀王逸少爲先師張元道始爲建孔子廟置學舍勸士人子弟入學逸少何修乃得此于蠻中乎劉好禮爲北方叛王所執西踰雪峩嶺以衣服賂叛王于戶東出鐵壁山南走七月至菊海始與戍兵接得歸菊海之名甚新

張宏範子珪少能挽强虎出林中抽矢直前虎人立洞其

喉從父平廣海宋禮部侍郎鄧光薦將赴水死宏範救出之令珪受學光薦嘗遺一編書日日相業語珪曰熟讀此後必賴其用後珪果兼將相有聲光薦可謂知人

李孟歷相武宗仁宗仁宗每稱其字御書秋谷二字以賜之英宗立鐵木迭兒讒之降集賢侍講學士度其必辭因中害之孟拜命欣然入院帝愕然曰李道復乃肯俯就集賢邪爾輩謂彼不肯爲是官今定何如由是讒不得行人臣處讒如此亦明哲之一端也

張養浩禱嶽祠泣不能起雨爲立降聞民間殺子以奉母者爲之大慟出私錢以祭之出賑饑民終日無怠惰膺勳

哭得疾不起關中之人哀之如父母如此等人真不愧民之父母

張廷瑞城虎嘯山以通開達夏貴以兵數萬圍之城當炮皆穿築柵柵壞依大樹張牛馬皮以拒炮貴絕其水道庭瑞取人畜溲煮之瀉土中洩其臭人日數合脣皆焦裂堅守踰月貴兵不得進度宋兵懈夜劫其營宋兵潰殺都統繼俊等五人斬千餘級如此惡戰死守睢陽不足異矣桑哥每雞初鳴坐省中六曹官後至者笞之趙孟頫爲兵部侍郎偶後至遽引受笞入訴於都堂右丞葉李曰古者刑不上大夫辱士大夫是辱朝廷也桑哥亟慰孟頫使出

自是所咎惟曹吏他日行東御墻下道險馬跌墜于河桑
哥言于帝移御墻稍西二丈許桑哥奸惡乃能優容賢者
如此耶亦未必識孟頫徒以詩畫取之爾帝欲使孟頫與
聞中書政事固辭有旨令出入宮門無禁仁宗常呼其字
而不名比之唐李白宋蘇軾史官楊載稱孟頫之才頗爲
詩畫所掩知其書者不知其文章知其文章者不知其經
濟人以爲知言元史子昂傳段段有意抑揚褒刺皆寓其
中惜筆力荏弱耳

黃潛婺州人卒于繡湖私第按志義烏有繡川湖花木映
川如繡故名潛與浦陽柳貫臨川虞集張章揭傒斯名儒

林四傑浦陽吳萊居深裏山中字書止有裏音鳥以組帶馬也宋宗室有土裏皆無四點乃書之誤

丞相問揭傒斯修史以何爲本曰用人爲本有學問文章而不知史事者不可與有學問文章知史事而心術不正者不可與用人之道當以心術爲本也真千古名言二十一史如范蔚宗魏收沈約皆心術不正讀者不可不知

李本魯狃爲郊廟禮儀使紀行禮節文于笏遇至尊不敢直書必識以兩圈帝偶取笏視之曰此爲皇帝字邪大笑還之今制舉表文遇前代皇帝陛下字易以四圈亦其遺意 狃爲禮部尙書有大官妻無子而妾有子盡以其田

入僧寺其子訟狎召其妻詰之曰汝爲人妻不以貲產遺其子何面目見汝夫地下乎卒反其田今仕紳巨室往往蹈此安得如狎者斷之乎

董搏霄僉淮南行省樞密院事行陸運之令每人行十步三十六人可行一里三百六十人可行十里三千六百人可行百里以夾布囊人負米四斗人不息肩米不着地排列成行日行五百回計路二十八里輕行十四里重行十四里日可運米二百石每運給米一升可供二萬人此百里一日運糧之術也其事可補運法之未備

導江先生張翼字達夫按隸書彙古須字立而待也儒生

好奇乃爾

襄陽之師不解金履祥獻策海道直搗燕薊以牽之歷敘海舶所經州郡縣邑下至巨洋別島難易遠近歷歷可據宋不能用後朱瑄張清海運之道視履祥所上書咫尺無異然後人服其精確學者有用之學固當如此然以賈似道爲相范文虎夏貴等爲將卽長江之戰望風而潰焉能直搗燕薊乎苟用其策以將予敵饋軍齎糧其亡彌速矣履祥謂劉恕于資治通鑑外別爲外紀以紀前事百家之說是非頗繆於聖人不可爲訓帝堯以前不經夫子刪定固野而難質夫子用魯史作春秋王朝列國之事非有

玉帛之使魯史不得而書非聖人筆削所加也因折衷邵氏皇極經世胡氏皇王大紀以尙書爲主旁及禮詩春秋舊史諸子表年繫事斷自唐堯接于通鑑二十卷曰通鑑前編凡所引書輒加釋訓以正其義多先儒所未發

江陰陸文圭子方語人曰以數攷之吾州二十年後有兵變慘于五代建炎吾死當塋不食之地勿封勿樹使人不知吾墓庶無暴骨之患其後江陰之亂冢墓盡發人服其先知子方宋丘隱城東學者稱牆東先生

儒學傳伯顏哈剌魯人博學能文以忠義死賊手贍思大食國人博極列國群書尤精吏治元人取材至此何愧立

賢無方

觀音奴知彰德府郡有崔府君祠豪民楊甲因王乙年饑就食淮南病死妻還甲已據其田僞作文憑曰乙生已售我妻訴于觀音奴令王妻同楊質于府君祠甲懼神靈先期以羊酒免巫囑勿洩其事王與楊詣祠質之果無所顯觀音奴疑之詰巫吐實楊果以羊酒免我囑神曰我實據王田幸神勿洩也既得實坐甲罪歸其田于王妻責神而撤其祠如此剛斷真可質鬼神矣

盧琦爲永春尹安溪寇數萬寇永春琦召邑民喻之曰汝等能戰則與之戰不能則我獨死之衆皆感憤曰使君何

言也使君父母其忍以父母畀賊耶今日之事有進無退
使君勿以爲憂踴躍爭奮攻賊大破之明日賊傾巢至又
破之大小三十餘戰斬獲數千邑民無死傷者賊爲遁去
兵革四起獨永春晏然讀此孟氏所云親上死長益信
元以制科取士其魁泰不華李黼李齊皆以忠義死可與
文丞相比烈

元侵日本舟師十萬阿塔范文虎將之至平壺島移五龍
山大風破舟諸將各擇堅好舡遁歸棄士卒十萬于山下
衆推張百戶爲主帥伐木作舟欲還日本人攻之盡戰死
虜去二三萬盡殺蒙古高麗漢人謂新附軍爲唐人皆奴

之十萬之衆逃歸者三人耳如此喪師大將不誅故宜再有安南八百媳婦之敗

桑哥令監察御史稽照文書書名卷末以遺佚至答御史四人後御史赴省部掾吏與之抗禮臺綱盡廢朝廷設御史所以防大奸乃權奸得而笞之掾吏得而侮之耳目安寄乎世祖雖誅之壞法亂政多矣

安西人張子蘂父喪每夜半背負土肘膝行地匍匐至塋所積土爲墳夏邑人陳乞兒年九歲母喪哀毀親負土爲墳高一丈廣十六步人憫其幼欲助之泣拜而辭讀之可歌可泣凡爲人子人皆可爲而皆不能爲可歎也

太平人胡光遠母喪廬墓一夕夢母欲魚晨起求魚以祭
母生魚五尾列墓前俱有噬痕鄰里驚異聚觀有獺出草
中浮水去衆以聞于官表其閭

晉寧人李忠事母至孝大德七年地震郇保山移所過廬
舍摧壓傾圯將近忠家分爲二行五十餘步復合忠家獨
完易云中孚可格豚魚楊子云至誠則金石爲開不益信
乎

蘭陽扈鐸少孤育于伯父伯父老無子以鐸爲後鐸爲伯
父娶妾生一女妾不慧熟寐壓女死伯父死妾有遺腹男
鐸懲前失告妹及妻妹護視之身廬戶外中夜審察不敢

安寢弟能食自抱哺與同臥起十年不怠弟有疾禱曰天
不伐予家鐸父子可去一人勿使伯父無後明早弟愈觀
其處心積慮可以托六尺之孤

餘姚石明三居山中一日自外歸覓母不見壁穿而臥內
有三虎子知母爲虎所害乃盡殺虎子礪巨斧立壁側伺
母虎至斫其腦裂而死復往倚巖石執斧伺殺牡虎明三
亦立死不仆張目如生所執斧牢不可拔觀之足泣鬼神
波羅國人阿尼哥以善粧塑列聖御容織錦爲之圖畫弗
及寶坻人劉元從阿尼哥學西天梵相神思妙合上都三
皇尤古粹識者以爲得三聖人之微仁宗勅元非有旨不

許爲人造他神像大都城南作東嶽廟元爲造仁聖帝像
巍巍然有帝王之度其侍臣像乃若憂思深遠者始元欲
作侍臣像久之未措手適閱秘書圖畫見唐魏徵像矍然
曰得之矣非若此莫稱爲相臣者遽走廟中爲之卽日成
士大夫觀者咸歎異

阿尼哥初至帝取明堂針灸銅像示之曰此宋時物歲久
闕壞無能修完之者汝能新之乎阿尼哥請試爲之二年
新像成關鬲脈絡皆具金工歎其天巧莫不媿服今順天
太醫院針灸銅人想其遺製邪

